

starogradski

OPĆINA STARI GRAD  
SARAJEVO



MUNICIPALITY OF STARI  
GRAD SARAJEVO

# haber

BESPLATAN PRIMJERAK • MART, 2022, broj 53.



**Počinjje  
izgradnja četvrte  
Socijalne zgrade**

- 6-7 Obilježavanja
- 8-9 Stipendije i priznanja
- 10 Općinsko vijeće
- 12-13 Heroji iz Starog Grada
- 14-18 Podrška institucijama, udruženjima i prijateljskim općinama
- 22 Upoznajte pobratimsku Općinu Mehmetçik



## Impressum

- Izdavač:** Općina Stari Grad Sarajevo
- Pripremili:** Almedina Porča  
Alma Imamović  
Jasenko Jašarević  
Nedim Šahović
- DTP:** Safet Mališević
- Fotografije:** Safet Mališević  
Nedim Šahović
- Štampa:** Pentagram d.o.o.
- Tiraž:** 3000
- Adresa:** Zelenih beretki br. 4  
71000 Sarajevo
- web:** [www.starigrad.ba](http://www.starigrad.ba)
- e-mail:** [info@starigrad.ba](mailto:info@starigrad.ba)
- Telefon:** +387 33 282 491



## Obilježavanja



# Svečano i dostojanstveno obilježen Dan nezavisnosti Bosne i Hercegovine

**Defile od Spomenika ubijenoj djeci Sarajeva do Sebilja • Bosna i Hercegovina na prvom mjestu • Odata počast bivšim borcima • Položeno cvijeće na spomen-obilježja**

**P**ovodom obilježavanja Dana nezavisnosti BiH i 30. godišnjice od proglašenja njene nezavisnosti, Općina Stari Grad Sarajevo, predvođena općinskim načelnikom mr. Ibrahimom Hadžibajrićem, organizovala je bogat kulturno-zabavni program. Obilježavanje jednog od najznačajnijih datuma u historiji BiH počelo je obilaskom spomen-obilježja, polaganjem cvijeća i učenjem Fatihe. Organizovan je i svečani defile u kojem su uz načelnika učestvovali svi njegovi saradnici i uposlenici Općine Stari Grad, vijećnici, članovi boračkih udruženja: Generali BiH, Prva brigada policije Stari Grad, Zelene beretke Stari Grad, Maloljetni

borci RBiH-Općina Stari Grad i brojni građani. Više stotina ljudi je svečanim mimohodom od Spomenika ubijenoj djeci Sarajeva 1992-1995. do Sebilja pokazalo jedinstvo, patriotizam i ljubav prema domovini, a upućene su i snažne poruke o historijskom značaju ovog datuma kao i važnosti očuvanja nezavisnosti Bosne i Hercegovine, posebno u ovom momentu.

## Glavu gore, Bosanci i Hercegovci

Defile se kratko zaustavio kod Katedrale gdje je izveden prigodan kulturno-zabavni program. Lamija Kabaš, učenica III razreda Srednje muzičke škole u Sa-





Članice Hora "Osmijeh" nastupile na programu



Kulturno-umjetnički program ispred Katedrale



Načelnik Hadžibajrić u druženju sa građanima

rajevu izvela je na violini himnu BiH, a Hor Osmijeh Centra za promociju i unapređenje zdravlja Stari Grad izveo je numeru „Jedna si jedina“. Načelnik Hadžibajrić je okupljenim čestitao Dan nezavisnosti i istakao da Bosanci i Hercegovci moraju čuvati nezavisnost svoje države.

„Živimo u jako turbulentnom periodu. Bosanci i Hercegovci trebaju staviti Državu Bosnu i Hercegovinu, njenu zastavu i njenu državnost na prvo mjesto, pa onda svoju nacionalnost. Ono što sada gledamo u Ukrajini, desilo se svojevremeno i Bosni i Hercegovini, a to je agresija na jednu suverenu i priznatu zemlju. Nije izvjesno da će se tako nešto desiti i Bosni i Hercegovini koja je duboko u zaleđu Evrope. Ali, moramo biti spremniji nego ikad i ne smijemo zaboraviti ono što nam se desilo. Glavu gore, Bosanci i Hercegovci!“ poručio je načelnik Hadžibajrić.

U svečanom defileu je učestvovao i pen-



Obilježavanje Dana nezavisnosti u ulici Sarači

### Desetine hiljada boraca i građana dali živote za zemlju

Vahid Alić, predsjednik Udruženja Zelene беретke poručio da Bosanci i Hercegovci moraju biti oprezni. „Na desetine hiljada boraca, šehida i građana Grada Sarajeva, kao i djece, dali su svoj život za ovu zemlju. Danas ponosno obilježavamo ovaj datum i sjećamo se najvećih heroja koji su u temelje BiH ugradili ono što je najvrijednije, svoje živote. Vidimo današnja dešavanja i zato moramo biti dosta oprezni, jedinstveni i ne dozvoliti da bilo ko unese nemir među građane Sarajeva i BiH,“ poručio je Alić.

Na kraju defilea, ispred Sebilja svi učesnici su simboličnim puštanjem u zrak 30 balona u bojama zastave BiH, obilježili 30. godišnjicu nezavisnosti zemlje.



Veliki broj učesnika defilea



Načelnik Hadžibajrić obratio se prisutnima



## Obilježavanja

zionisani general Prvog korpusa ARBiH, Vahid Karavelić, koji je također uputio čestitke povodom Dana nezavisnosti.

„Nezavisnost je nešto što svaki čovjek mora iznad svega uvažavati i poštovati i dati sve od sebe za njeno očuvanje. Država je kao kuća neke porodice. Ako ta kuća nema prozore i vrata, a država nema sve ono što treba da ima, onda će ta porodica u kući biti nesigurna isto kao i građani u toj državi. Imamo najsvježiji primjer danas da je Ukrajina imala svoju nezavisnost i vidimo kako u trenutku ta nezavisnost može biti ugrožena,“ poručio je general Karavelić.



General Vahid Karavelić

## Svečana sjednica u Općini Stari Grad

U Sali 1 Općine Stari Grad povodom Dana nezavisnosti upriličen je svečani program u sklopu kojeg je održana i svečana sjednica, uz prigodna obraćanja o značaju ovog datuma, uručenje nagrada bivšim borcima i darovima za najmlađe.

U programu obilježavanja Dana nezavisnosti BiH posebno mjesto pripalo je udruženjima „Zelene beretke Stari Grad“ i „Prva brigada policije Stari Grad“. Borci ovih udruženja su jedni od najzaslužnijih što je Bosna i Hercegovina danas slobodna, nezavisna, i međunarodno priznata država. Općina Stari Grad i načelnik Hadžibajrić odlučili su da novčano nagrade po deset istaknutih članova ovih udruženja, kao znak pažnje za njihov doprinos. Jedan od njih je bio i Kemo Musić, član Udruženja „Prva policijska brigada Stari Grad“. „Veliko hvala Općini i načelniku Hadžibajriću što misle na nas bivše borce i ne zaboravljaju naš doprinos za ovu državu“, rekao je Musić.

Za kulturno-zabavni dio programa bili su zaduženi članovi Centra za promociju i unapređenje zdravlja Općine

### Posjeta spomen-obilježjima

Delegacija Općine Stari Grad Sarajevo, predvođena općinskim načelnikom mr Ibrahimom Hadžibajrićem obilježila je 1. mart, polaganjem cvijeća i učenjem Fatihe na značajnim spomenicima za Sarajevo i cijelu Bosnu i Hercegovinu: Šehidsko mezarje Kovači i mezar prvog predsjednika Predsjedništva RBiH rahmetli Alije Izetbegovića, Vječna vatra, Spomenik ubijenoj djeci opkoljenog Sarajeva 1992-1995 i Spomen park „Vraca“.



Destanović, Batalović i Hadžibajrić na polaganju cvijeća



Sa Svečane sjednice povodom Dana nezavisnosti Bosne i Hercegovine



Nagrada za bivše borce



Nur Ahmetović izveo recitaciju

Stari Grad i njihov hor “Osmijeh” koji su izveli numeru “Zemljo moja”. U program su uključeni i najmlađi, polaznici starogradskih vrtića “Biseri” i “Pčelica”

koji su izveli prigodne plesne tačke, dok je sedmogodišnji talentovani osnovac Nur Ahmetović izveo recitaciju „Ostajte ovdje“.

# Općina Stari Grad i Fondacija Hemiias grade socijalnu zgradu u kojoj će zbrinuti djecu bez roditelja i socijalno ugrožene

**S**edam porodica iz Starog Grada za nekoliko mjeseci uselit će u nove stanove u stambenoj zgradi koja će biti sagrađena u ulici Čadordžina, čime ova lokalna zajednica nastavlja stambeno zbrinjavanje najugroženijih kategorija, a među onima koji će dobiti krov nad glavom ovaj put će biti i djeca bez roditelja. Izgradnja socijalne zgrade čija je vrijednost između 800.000 i 1 miliona konvertibilnih maraka zajednički je projekat Općine Stari Grad Sarajevo i Fondacije Hemiias, a ugovor o uređenju međusobnih prava i obaveza na ovom projektu danas su potpisali općinski načelnik mr Ibrahim Hadžibajrić i direktor Fondacije Hemiias Hajriz Brčvak.

Socijalnu zgradu u ulici Čadordžina u potpunosti će finansirati donator Fondacija Hemiias, a Općina Stari Grad osigurala je zemljište za gradnju i sve administrativne dozvole. Izražavajući zahvalnost donatoru koji je prepoznao značaj ulaganja u ovu lokalnu zajednicu i zbrinjavanje socijalno ugroženih, načelnik Hadžibajrić istakao je da su ispunjeni svi uslovi da se počne sa realizacijom ovog projekta. "Sretni smo što imamo partnere kao što je gospodin Brčvak i Fondacija Hemiias koji je odlučio da nas podrži u naporima da zbrinjavamo naše socijalno ugrožene građane. Za svaku porodicu siguran krov nad glavom predstavlja najveću potrebu u životu. Nijedna institucija do sada nije na ovaj način rješavala ova pitanja, a smatram da bi trebali. Što se tiče gospodina Hajriza Brčvaka, nikada dosad nisam upoznao nekog poput njega, osobu koja istinski želi da pomogne. Prilikom jednog našeg ranijeg susreta, sam je izrazio želju da se riješi stambeno pitanje onih koji to nikada sami sebi ne bi mogli priuštiti. I, evo nas na početku jedne lijepe i uspješne priče kada najavljujemo izgradnju zgrade baš za tu kategoriju," izjavio je načelnik Hadžibajrić.

"Općina je obezbijedila zemljište za ovu zgradu i već smo osigurali građevinsku i urbanističku dozvolu, tako da projekat može početi," dodao je načelnik Hadžibajrić i istakao da će po završetku izgradnje zgrada biti uknjižena na Općinu Stari Grad i ostati u njenom vlasništvu, a da će o korisnicima zajedno odlučivati Općina i Fondacija.



Direktor Fondacije Hemiias Hajriz Brčvak i načelnik Hadžibajrić potpisali sporazum

## Gradnja će trajati 18 mjeseci

Direktor Fondacije Hemiias, Hajriz Brčvak istakao je da činjenica da ovaj projekat počinje baš danas, u svetom mjesecu ramazanu, daje potvrdu da su njegovi učesnici na pravom putu.

Kazao je da nije bilo dileme da li će se uključiti u ovaj projekat, te da je bio spreman uložiti i više da je za tim bilo potrebe. "Svi smo mi jedna zajednica i meni je drago da mogu da učestvujem u ovakvim stvarima jer čovjek koji daje ne može biti siromah. Zahvalan sam što mi je Uzvišeni pokazao put kojim trebam da idem jer činiti dobro je nešto što se ne može uporediti ni sa čim. Meni je drago što sam dobio šansu da budem dio ove priče i posebno što ćemo usrećiti jetime i obezbijediti im krov nad glavom," izjavio je Brčvak.

Na pitanje zašto je odabrao baš Stari Grad za izgradnju socijalne zgrade odgovara da tu dileme nije bilo. "Stari Grad sam izabrao zato što sam



Budući izgled zgrade

upoznao načelnika Ibrahima Hadžibajrića i sekretarku Almu Destanović na jednom sastanku i vrlo brzo smo se sve dogovorili. Siguran sam da to nije bio slučajan susret, jer ništa se ne dešava slučajno. Mi smo ljudi koji radimo bez ikakvog interesa, samo zato što volimo ljude i Stari Grad, imamo čist nijet i iskrenu želju da pomognemo i drago mi je da smo se sreli jer sada možemo zajedno učiniti mnogo dobra," poručio je Brčvak. Najavljeno je da će izgradnja zgrade početi već tokom ovog mjeseca, a radovi bi trebali biti završeni za 18 mjeseci.



Do sada izgrađene Socijalne zgrade na Brusuljama, Baruthani i Čadordžinoj



## Podrška



Obilazak socijalno ugroženih porodica tokom cijele zime

## Stalno na terenu i sa građanima: Socijalno ugrožene porodice su naš prioritet

Posjeta porodicama kojima su sanirane stambene jedinice ● Zima toplija za 30-ak porodica ● Građanima osigurane i dodatne količine ogrjeva i prehrambeni paketi

**T**okom zimskih mjeseci općinski načelnik mr. Ibrahim Hadžibajrić sa saradnicima kontinuirano je obilazio socijalno ugrožene porodice kako bi se upoznao sa njihovim stanjem, potrebama i omogućio im neophodnu pomoć. Više od 30 porodica iz Starog Grada u prošloj godini stambeno je zbrinuto na način da im je Općina Stari Grad finansirala sanaciju stambenih jedinica, donirala građevinski materijal i sredstva za radove. Ove porodice tu tokom januara i februara ove godine posjećene u njihovim domovima, a po potrebi im se osigurala i dodatna pomoć.

„Odlučio sam da obiđemo ove porodice i vidimo u kakvim uslovima provode ovu zimu, da li im još nešto treba, jesu li njihovi domovi sada us-

### Sanacije, građevinski materijal i finansijska sredstva

U toku 2021. godine iz budžeta Općine Stari Grad finansirana je sanacija stambenih jedinica za 31 porodicu, od toga je urađena sanacija 13 stambenih jedinica sa izabranim izvođačem radova, 12 porodica je dobilo građevinski materijal da sami izvedu radove, a šest ih je dobilo finansijska sredstva s ciljem poboljšanja stambenih uslova. Projekat se nastavlja u i 2022. godini putem Službe za komunalne poslove i investicije Općine Stari Grad Sarajevo.

lovniji nego prije. Iz onoga što su mi rekli zaključio sam da su zadovoljni

izvedenim radovima i sad su ove porodice u toplom, na suhom i sigurno su riješili jednu veliku brigu,“ kazao je načelnik Hadžibajrić. „Naš posao ovdje ne prestaje, nego nastavljamo i u godini koja je pred nama kako bi pomogli i ostalima koji ne mogu sami finansirati obnove svojih domova. U budžetu smo planirali 140.000 KM i onima koji ispunjavaju uslove pomoći ćemo u popravci krovova, fasada, stolarije, unutrašnjosti objekata, pomoćnih prostorija i svega onog što im je neophodno za život,“ poručio je načelnik Hadžibajrić. Da se stambenom zbrinjavanju socijalno ugroženih porodica u ovoj općini posvećuje značajna pažnja govori i podatak da je u posljednje dvije godine sanirano 87 stambenih jedinica i uloženo 270.000 KM.

## Topliji domovi i siguran krov nad glavom

Ispod samog Trebevića, u ulici Ablakovina, živi petočlana porodica Elvedina Šljokića. Elvedin i njegova supruga su nezaposleni, a on je i teško bolestan. Sanacija kuće i topliji dom za njihovu djecu, za njih je dugo godina bila samo neispunjeni san, a živjeli su u uslovima koji su bili ispod svakog standarda.

„Imali smo izgrađen samo jedan sprat kuće i to od betonskih blokova. Bilo je hladno, voda je prolazila sa svih strana, smrzavali smo se ovdje ispod Trebevića. Podnio sam zahtjev za sanaciju i fasadu i taj zahtjev mi je načelnik Hadžibajrić odmah odobrio. Da je više ljudi kao što je on svima bi nam bilo puno bolje“, ispričao je Elvedin. Kako je kazao, njihova kuća je sanirana i završena pred sami početak zime i ovo je prvi put da zimu provode u toplom i na suhom.

Na Mahmutovcu je općinski načelnik Ibrahim Hadžibajrić posjetio 79-otogodišnju Hajriju Gašaj koja živi sa sinom koji je nezaposlen i u vrlo su teškoj materijalnoj situaciji. Hajrija je imala problem sa pomoćnim objektom koji se u potpunosti srušio i nije imala gdje odlagati drva i ćumur za ogrjev, te je sa strahom čekala ovu zimu. Taj problem je na vrijeme riješen i sagrađen joj je novi objekat. „Meni ovo puno znači. Ja teško hodam i ne znam kako bih preživjela ovu zimu da mi niste sagradili šupu za ćumur i drva. Puno mi znači i što ste došli i što me niste zaboravili,“ ispričala je Hajrija Gašaj.

## Gradani se prisjetili kako je bilo nekad i sad

Fahrudin Karić sa Bistrika obratio se za pomoć sanacije trošnog i starog krova stambenog objekta u kojem osim njegove porodice žive još dvije porodice sa djecom. Krov je bio u izuzetno lošem stanju i prokišnjavao je što im je predstavljalo veliki problem i otežavalo svakodnevni život. Fahrudinova supruga Vahida, ispričala je da krov nije poprav-



*Sanirana ulazna kapija Fati Ganić*



*Porodici Šljokić sanirana fasada*



*Hajrija Gašaj sa načelnikom Hadžibajrićem*



*Ramizi Sinanović sanirano kupatilo*

ljen od dana kada je sagrađen objekat, te da je ovo bila prva sanacija. „Ovdje nas živi 14-ero, tri porodice sa djecom i mi sada imamo siguran krov nad glavom zahvaljujući načelniku Hadžibajriću i Općini Stari Grad. Nakon toliko godina patnje i prokišnjavanja, ovo za nas mnogo znači,“ ispričala je Ramiza Karić.

Za teško bolesnu Raziju Sinanović najveći problem predstavljao je nedostatak kupatila, posebno imajući u

vidu da se bori sa dijagnozom ulceroznog kolitisa. „Najteže mi je bilo noću izlaziti iz stana da koristim vanjsko kupatilo. Sama sam i bilo me strah, a kada ste mi sanirali kupatilo u stanu vi ste meni život spasili. Ne mogu vam ni opisati koliko ste mi pomogli,“ ispričala je Ramiza, te se požalila i na kvar na ulaznim vratima nakon čega je načelnik naložio da se izvrši popravka već u toku tog dana.



## Obrazovanje

# Općina Stari Grad ove godine ima 334 stipendiste za koje se izdvaja više od 300.000 KM

**Nagrade za zlatne i srebrene značke univerziteta u Sarajevu • Mladi poručuju da žele ostati u svojoj zemlji • I dalje manjak učenika deficitarnih zanimanja**



Načelnik Hadžibajrić sa stipendistima iz boračkih porodica

Iz budžeta Općine Stari Grad Sarajevo ove godine će biti izdvojeno 300.960 konvertibilnih maraka za stipendiranje učenika i studenata. Stipendije će dobiti učenici i studenti iz boračkih porodica, izuzetno nadareni učenici i studenti, te učenici deficitarnih zanimanja.

Načelnik Općine Stari Grad Sarajevo mr. Ibrahim Hadžibajrić potpisao je ugovore sa 154 nadarena učenika i studenta, 180 učenika i studenata iz boračkih porodica, te tri učenika deficitarnih zanimanja koji su tako postali stipendisti Općine Stari Grad u školskoj/akademskoj 2021/2022. godini.

U obračunu studentima i učenicima načelnik Hadžibajrić je istakao da je Općina Stari Grad u posljednjih 13 godina značajno povećala sredstva za stipendije i da je to pravi način za podršku mladim ljudima.

„U posljednjih 13 godina izdvojili smo oko 3,6 miliona KM za stipendi-

ranje naših učenika i studenata. Uzmemo li u obzir da je prije tog perioda Općina Stari Grad na godišnjem nivou izdvajala oko 70.000 KM za stipendije, a sada godišnje oko 300.000 KM to je značajno uvećanje,” izjavio je načelnik Hadžibajrić. „Moram dodati da su ove godine u Starom Gradu stipendije dobili svi koji su aplicirali i ostvarili uslove. Čak smo planirali malo više sredstava tako da možemo dodijeliti još stipendija ako se ukaže potreba. Ponosni smo na naše uspješne učenike i studente i uvijek ćemo ih dodatno stimulirati,” poručio je.

## Stipendistima je ova pomoć značajna

Među ovogodišnjim dobitnicima stipendije ima i studenata koji su stipendisti Općine Stari Grad još od srednje škole. Jedna od njih je uspješna apsolventica Pravnog fakulteta Univerziteta u Sarajevu

Amila Smajić sa prosječkom ocjena od 9.9.

„Ova stipendija i ovakav vid podrške pokazuju da mladi ni u ovakvim vremenima nisu zaboravljeni. Stipendista sam Općine Stari Grad već sedam godina i to mi je dalo neku samostalnost na početku i predstavlja ogroman vid podrške. Ja svoju budućnost ne vidim izvan Bosne i Hercegovine pogotovo zbog zanimanja koje sam odabrala. Mislim da trebam biti najbolja u onome što radim i da na taj način pomognem zajednici“, poručila je Amila.

Emir Topalbećirević, učenik je Richmond Park koledža, četvrta godina. „Ova podrška mi mnogo znači. Načelnik naše Općine radi na tome da ulaže u mlade, što mislim da je najbitnije u ovoj teškoj situaciji. Ja sam godinama stipendista Općine Stari Grad Sarajevo i kao učenik i kao sportista i drago mi je što načelnik Hadžibajrić prepoznaje kvalitet mladih ljudi i to je jedini način za dalje i za uspjeh u budućnosti“, izjavio je Emir Topalbećirević.



## Spremni stipendirati veći broj učenika deficitarnih zanimanja

Već šestu godinu zaredom Općina Stari Grad stipendira i učenike deficitarnih zanimanja i dosad je za te namjene izdvojeno oko 25.000 KM: Nažalost interesovanje i dalje nije na zavidnom nivou i sve je manje učenika koji se odlučuju za strukovna zanimanja.

„Volio bih kada bismo imali veći broj stipendista i u oblasti deficitarnih zanimanja. Mladi ljudi bi trebali shvatiti da je sve veća potražnja na tržištu, kako u svijetu tako i kod nas za takvim zanimanjima i mi smo spremni da ih stipendiramo i pomognemo im u školovanju“, poručio je Hadžibajrić

## Nagrađeno dvanaest studentata – zlatnih i srebrnih znački

Osim stipendijama, rad, trud i zalaganje mladih ljudi iz Starog Grada prepoznati su i na druge načine. Najbolje studentima iz Starog Grada, dobitnicima zlatnih i srebrnih znački Univerziteta u Sarajevu, načelnik Hadžibajrić dodijelio je plakete i novčane nagrade za izuzetne rezultate koje su postigli. Ukupno 12 studentata iz Starog Grada dobilo je priznanja, od toga su dvije zlatne i deset srebrnih znački, a prosjek njihovih ocjena kreće se od 9 do 9,99.

„Za naše nadarene studente koji su dobitnici zlatne i srebrne značke, ali i za ostale, moramo naći načina kako da ostanu ovdje i daju svoj doprinos razvoju i promjenama na bolje u našoj državi“, dodao je načelnik Hadžibajrić.

Uz načelnika Hadžibajrića uručanju plaketa prisustvovao je i rektor Univerziteta u Sarajevu prof.dr.Rifat Škrijelj koji je pozdravio ovu praksu načelnika i Općine Stari Grad i izrazio zahvalnost na prepoznatom trudu ovih uspješnih i vrijednih studentata.

„Najvažnije što bi trebalo učiniti za ove mlade ljude koji su zaista u odnosu na svoju generaciju ulagali veći trud, pa su zbog toga i postigli ta najprestižnija priznanja zlatnu i



Načelnik Hadžibajrić i Amila Smajić



Amra Pezo sa rektorom i načelnikom

### Ovo nam mnogo znači

Hana Salihović dobitnica srebrne značke, studentica je master studija Muzičke akademije i studira solo pjevanje. „Nisam se nadala srebrnoj znački i moj cilj bio je iskazati se što bolje u svojoj profesiji i poslu. I ova srebrna značka mi je bila jedna velika kruna mog rada i zalaganja.

Mnogo znači kada dobijemo priznanje za naš rad, pogotovo nama umjetnicima, ovo nam predstavlja veliki doprinos i značaj“, rekla je Hana.



Hana Salihović dobitnica srebrne značke



Hadžibajrić i Škrijelj sa zlatnim i srebrnim značkama

srebrnu značku, jeste da dobiju zaposlenje. I ja se iskreno nadam da će u našoj zajednici od lokalne, preko Grada, Kantona, Federacije i države ti mladi i uspješni ljudi dobiti što su zaslužili svojim radom, a to je radno mjesto i da mogu kreirati svoj život i zasnivati svoje porodice,“izjavio je prof. dr. Škrijelj.„Ovo što radi uvaženi načelnik Hadžibajrić je samo kontinuu-

itet praćenja koje počinje od stipendiranja, pa do nagrada na ovaj način. Ovu praksu sada preuzimaju i druge lokalne zajednice u Kantonu Sarajevu,“ dodao je prof Škrijelj.

Studenti koji su dobili priznanje i nagrade zahvalili su načelniku Hadžibajriću i poručili kako je ovo kruna njihovog studija i da samim tim mnogo znači kada to neko prepozna.

## Općinsko vijeće

## 11. sjednica Općinskog vijeća

Na prijedlog općinskog načelnika mr Ibrahima Hadžibajrića je na 11. sjednici Općinskog vijeća Stari Grad Sarajevo koja je održana 30.12.2021. godine jednoglasno usvojen prijedlog budžeta za 2022. godinu u iznosu od 19.414.200 KM. Nakon provedene javne rasprave o nacrtu Odluke o visini godišnjeg paušalnog poreza na imovinu, Općinsko vijeće je usvojilo prijedlog pomenute odluke. Na 11. sjednici usvojen je i prijedlog Odluke o izmjenama i dopunama Odluke o dodjeli i prodaji stanova kojima raspolaže Općina Stari Grad Sarajevo.



*Usvojen prijedlog Budžeta*

Vijećnici su primili k znanju informacije o formiranju jedinstvene baze stanova kojima raspolaže Općine Stari Grad Sarajevo, o realizaciji Odluke o prokopavanju saobraćajnica čiji je upravitelj

Općina Stari Grad, te o provedenim aktivnostima civilne zaštite.

Općinsko vijeće Stari Grad Sarajevo usvojilo je i Nacrt Programa rada OV-a za 2022. godinu koji će biti upućen u javnu raspravu. Također, prihvaćen je prijedlog Odluke o objavljivanju javnog oglasa za imenovanje člana Općinske izborne komisije Stari Grad Sarajevo, kao i prijedlog Rješenja o ovlaštenju Komisije za izbor i imenovanje za provođenje postupka po ovom javnom oglasu.

## 12. sjednica Općinskog vijeća

Općinsko vijeće Stari Grad Sarajevo održalo je 27. januara, 12. redovnu sjednicu na čijem dnevnom redu se našlo 12 tačaka. Općinsko vijeće Stari Grad usvojilo je i prijedlog Zaključka o usvajanju inicijative za dodjelu naziva trgu iznad podzemne garaže u ulici Avdage Šahinagića. Vijeće je prihvatilo inicijativu da se trg nazove "Trg Prve brigade policije" koju je iznijelo Udruženje Prva brigade policije Stari Grad. U obrazloženju inicijative ovo Udruženje navodi da se radi o policijsko-vojnoj formaciji koja je dala ogroman doprinos u odbrani općine i grada Sarajeva od agresije. Policijaci ove brigade branili su državu na svim ratištima širom BiH. U toku odbrambeno-oslobodilačkog rata u redovima Prve brigade policije Stari Grad borilo se 1.230 boraca, a 44 pripadnika ove brigade položili su svoje živote u odbrani domovine. Za iskazanu hrabrost i požrtvovanje u oružanom suprotstavljanju agresoru, 20 pripadnika brigade odlikovano je najvećim ratnim priznanjima.



*Prijedlog odluke o nazivu trga*

Izgradnja podzemne garaže sa višenamjenskim trgovom u ulici Avdage Šahinagića je najveći investicioni projekat Općine Stari Grad koji je realizovan 2020. godine u vrijednosti od 7 miliona KM. Ovaj projekt realizovan je prvenstveno zahvaljujući dugogodišnjim naporima i zalaganjima općinskog načelnika mr Ibrahima Hadžibajrića za omogućavanje kreditnih sredstava Saudijskog fonda za razvoj kojim je finansirana izgradnja garaže i trga, ali i još tri značajna projekta. Garaža i trg svečano su otvoreni 01.marta 2020. godine velikim koncertom i kulturno-zabavnim programom kojem je prisustvovalo više stotina građana.

## 13. sjednica Općinskog vijeća

Općinsko vijeće Stari Grad Sarajevo održalo je 24. februara, 13.redovnu sjednicu na kojoj je usvojen niz odluka iz oblasti imovinsko-pravnih odnosa, privrede, lokalnog razvoja i drugog.

Općinsko vijeće usvojilo je izvještaj o radu Pravobranilaštva Općine Stari Grad za period od 01.01 do 31.12.2021. godine. Izvještaj je podnio v.d.pravobranioca Enes Smajlović, a usvojen je većinom glasova. Usvojen i Prijedlog odluke o raspisivanju izbora za savjete mjesnih zajednica Općine Stari Grad Sarajevo. Izbori za članove Savjeta mjesnih zajednica održat će se u nedjelju, 24.aprila od 10-16,00 sati, istovremeno u svih 16 mjesnih zajednica.

Povodom priprema za obilježavanje 02.maja, Dana Općine



*Usvojen izvještaj Općinskog pravobranilaštva*

Stari Grad Sarajevo, Općinsko vijeće usvojilo je i Prijedlog Rješenja o imenovanju Komisije za priznanja Općine Stari Grad koja se tradicionalno dodjeljuju na svečanoj sjednici povodom ovog značajnog datuma. Također, usvojen je i Prijedlog Odluke o formiranju Organizacionog odbora za obilježavanje Dana Općine. Načelnik Prve PU – Stari Grad Salih Tufo predočio je vijećnicima i informaciju o poduzetim aktivnostima policijskih službenika u toku 2021. godine. U informaciji se navodi da je u periodu januar-decembar 2021. godine na području djelovanja Prve PU evidentirano ukupno 251 krivično djelo od čega su pripadnici Prve PU rasvijetlili 185 krivičnih djela, što procentualno iznosi 73,70%.



# Uređene obale i korito rijeke Miljacke, od Bentbaše do ušća Moščanice

**Bolji uslovi za sve posjetioce popularnog šetališta Aleja ambasadora • Građanima na raspolaganju i moderni park • Jedinstveno izletišta na samo pet minuta od grada**



Očišćene obale od Bentbaše do ušća Moščanice u dužini od 1.400 metara

**O**bale i korito rijeke Miljacke, od Bentbaše do ušća Moščanice na Darivi, u dužini od 1.400 metara očišćeni su od šiblja i niskog rastinja, trave i otpada, a urađeno je i potkresivanje grana uz riječno korito, te uklonjen nataloženi mulj i otpad iz korita rijeke.

Na ovaj način osigurani su puno bolji uslovi za sve posjetioce popularnog šetališta Aleja ambasadora, šetače, kao i izletnike uz Miljacku, te korištenje postavljene mobilijara.

Na ovom izletištu posjetiocima je u ponudi i moderno igralište "Park prijateljstva" na Darivi koje pored dječijeg mobilijara sadrži i sprave za fitness, te sprave za djecu s posebnim potrebama.

"Naš je cilj da od ove lokacije napravimo prepoznatljivo mjesto za posjetu i odmor naših građana, ali i mjesto koje će posjećivati turisti. Lokacija je jedinstvena po tome što na samo pet minuta od samog centra grada, imate prirodne ljepote i mjesto za odmor. To čini šetalište od Bentbaše do Kozije ćuprije jedinstvenim u odnosu na sve druge," izjavio je načelnik Općine Stari


Grad Ibrahim Hadžibajrić. "Uložili smo značajna sredstva u uređenje šetališta u prethodnim godinama, a i ubuduće ćemo raditi na obogaćivanju novim sadržajima. Čišćenje obala i korita rijeke doprinijelo je ne samo ljepšem izgledu, nego će spriječiti i eventualno izljevanje rijeke iz korita u slučaju padavina i poplava, te je ovo preventivno djelovanje," poručio je načelnik Hadžibajrić.

## Uložena značajna sredstva u uređenje lokaliteta

Općina Stari Grad Sarajevo je zajedno sa partnerima u proteklom periodu uložila više od 700.000 KM u ovaj lokalitet. Igralište 'Park prijateljstva' sagrađeno je u saradnji sa Ambasodom Švedske u BiH i koštalo je 180.000 KM, a vrlo brzo je postalo nezaobilazno mjesto okupljanja porodica sa djecom, ali i svih drugih Generacija. Kompletna dionica, od Bentbaše do Kozije ćuprije pokrivena je modernom LED rasvjetom, a šetalište je pokriveno i

video nadzorom.

Krajem prošle godine, u saradnji sa Gradskom upravom Grada Sarajevo, urađena je sanacija lokalne saobraćajnice Dariva-Kozija ćuprija u dužini od 1.600 metara, vrijedna više od 300.000 KM. Duž šetališta Aleja ambasadora je do sada 213 akreditovanih ambasadora u BiH zasadilo stabla lipe. Vrijednost radova na čišćenju korita Miljacke iznosila je 67.860 KM. Sredstva su osigurali Općina Stari Grad Sarajevo, Ministarstvo privrede KS i Zavod za izgradnju KS.



Lokaciju redovno održavaju općinski uposlenici

## Posjeta

# Tri heroja iz Starog Grada koji su pobijedili rak



*Načelnik Hadžibajrić u posjeti 14-godišnjem Eminu Šujanoviću*

**S**vako dijete trebalo bi živjeti sretno i bezbrižno djetinjstvo neopterećeni brigama i problemima koje nosi svakodnevni život, a posebno teškim oboljenjima kao što je rak. Nažalost, danas to nije tako i sve više svjedočimo primjerima djece iz našeg najbližeg okruženja koja se bore sa teškim oblicima ove bolesti. Maligne bolesti od kojih djeca najčešće obolijevaju su leukemije, karcinomi mozga, limfomi i tumori poput neuroblastoma, a većina ih se ne može spriječiti ili predvidjeti. Uzroci raka kod djece često su nepoznati, a borba s bolešću podjednako je teška za djecu kao i njihove roditelje: iscrpi, kako fizičku i psihičku snagu, tako i finansijske mogućnosti.

## Alen, Abdulah i Emin – prebrodili sve teškoće i dobili bitku protiv raka

Alen Burek, Abdulah Zrnčić i Emin Šujanović tri su dječaka iz Starog Grada čije je bezbrižno djetinjstvo iznenada prekinula ova opaka bolest i koji su prošli dugotrajnu, mučnu i neizvjesnu borbu iz koje su na kraju izašli kao pobjednici. Povodom 15. februara, Međunarodnog dana djece oboljele od raka, ali i kako bi im pokazao da nisu sami i da imaju podršku, Alena, Emina i Abdulaha posjetio je

načelnik Općine Stari Grad mr Ibrahim Hadžibajrić i uputio im riječi podrške i poklone.

Alen je imao svega tri godine kada su se pojavili prvi simptomi akutne leukemije. Kako je ispričala njegova majka Amila, sve je počelo kada se Alen požalio na bolove u nozi. Nakon nekoliko pogrešnih dijagnoza i posjeta ortopedima, uradili su nalaze krvi koji su upućivali na leukemiju.

“Srećom, Alenu je na vrijeme uspostavljena dijagnoza i krenuli smo sa lijekovima i hemoterapijama. Njemu nije trebala transplantacija jer koštana srž nije bila zahvaćena. Sada je dobro, prestao je da pije lijekove prije nekoliko mjeseci. Bili smo na kontroli prije desetak dana i sve je u redu,” ispričala je Amila. Dok





*Načelnik Hadžibajrić uručio poklone*



*Sa porodicom Emina Šujanovića*



*Alen je prestao piti lijekove*



*Abdulah Zimić danas ima svijetlu budućnost*



*Eminova borba sa leukemijom trajala 6 godina*

je ona pričala o teškom iskustvu koje je prošla njihova porodica koji su za vrijeme liječenja boravili u Roditeljskoj kući, ovaj hrabri dječak se zabavljao igračkama i nabrajao svoje želje za budućnost. Kako je kazao, najviše bi volio da ima svoj mobitel, a i ta će mu želja biti ispunjena zahvaljujući poklonu koji mu je uručio načelnik Hadžibajrić.

## Uspješno izvršene transplantacije

Abdulah Zrnić je tinejdžer koji je danas odličan učenik Mašinsko-tehničke škole, svakodnevno vozi bicikl i trenira kick boks, a do prije samo nekoliko godina njegov je život izgledao potpuno drugačije. Dijagnozu akutne leukemije dobio je prije 12 godina i počelo je njegovo liječenje na Kliničkom centru

Univerziteta u Sarajevu.

“Kada sam dobio dijagnozu, nisam baš bio svjestan situacije, nisu mi ni rekli puno, a moj dječiji mozak to nije mogao shvatiti. Roditeljima je bilo baš teško, sjećam se. Liječio sam se na Koševu, gdje sam prošao 4 ciklusa hemoterapija i onda smo otišli u Bolognu gdje mi je izvršena transplantacija. Poslije transplantacije nisam više imao nikakvih problema. Prije dvije godine sam bio na kontroli u Italiji i bilo je sve u redu,” ispričao je Abdulah. Nastavio je hrabro koračati kroz život, a pored sporta posvetio se i učenju stranih jezika što će mu pomoći u planiranju bolje budućnosti.

Šest godina trajala je borba Emina Šujanovića sa dijagnozom akutne leukemije. Sve je počelo kada mu je bilo svega četiri godine, a danas deset godina poslije, ovaj simpatični dječak,

učenik VIII razreda OŠ”Saburina” mašta o budućnosti kao i svaki njegov vršnjak i na bolest više ne misli.

“Imao sam dvije transplantacije u Turskoj, prva je izvršena na moj 7-i rođendan, ali su nastale komplikacije i morali su mi uraditi još jednu. Donor je bila moja mama. Sjećam se da smo 90 dana boravili u izolaciji, u jednoj prostoriji iz koje nismo smjeli izlaziti i gdje je sve bilo sterilno. Danas je sve to iza mene, prve dvije godine poslije transplantacije bile su kritične, ali sada je sve u redu i redovno idemo na kontrole,” ispričao je Emin.

Načelnik Hadžibajrić je saslušao njihove teške životne priče, te im poručio da se obrate svojoj lokalnoj zajednici za svaku pomoć koja im bude potrebna. Osim toga, lično im je uručio novčane hedije kao mali znak pažnje za hrabrost i borbu koju su prošli.

## Projekti

# Značajna podrška projektima Islamske zajednice kroz obnovu džamija i projekte za mlade

Izdvojeno 53.000 KM za obnovu i opremanje džamije • Podrška projektu 'Čitalačka značka' • Jačanje i razvoj obrazovanja i kulture mladih

S ciljem jačanja i razvijanja obrazovanja i kulture kod mladih, sticanja dodatnog znanja i razvoja zajedničke vizije o domovini i svom identitetu, jeziku, vjeri i kulturi, općinski načelnik mr. Ibrahim Hadžibajrić donio je odluku o finansijskoj podršci projektu "Čitalačka značka" Muftijstva sarajevskog. Ugovor o saradnji na ovom projektu potpisali su načelnik mr Ibrahim Hadžibajrić i Muftija sarajevski prof.dr.Nedžad Grabus.

"Smatram veoma značajnim da mladi ljudi stiču dodatna znanja o bližoj i daljoj historiji naše zemlje, posjećuju historijski važne lokacije u BiH, a istovremeno uče o svojem jeziku, vjeri, kulturi. Zbog toga smo podržali projekat 'Čitalačka značka' u nadi da će se što više mladih odazvati, te čitati odabrana djela, učestvovati u debatama i širiti znanje," istakao je općinski načelnik mr.Hadžibajrić prilikom potpisivanja ugovora. Iz budžeta Općine Stari Grad za podršku ovom projektu bit će izdvojeno 10.000 KM.

Muftija sarajevski prof.dr. Nedžad Grabus se zahvalio za ovu podršku istakavši da mu je drago što lokalna zajednica prepoznaje značaj ovakvih projekata i podržava ih.

"Evidentno je da je Općina Stari Grad prema načinu rada i rukovođenja općinskog načelnika mr.Hadžibajrića izabrala evropski standard i put i to je za svaku pohvalu. U Muftijstvu sarajevskom smo u okviru naših aktivnosti prema mladima pokrenuli nekoliko važnih kulturno-edukacijskih projekata, a 'Čitalačka značka' je jedan od njih. Drago mi je što sarađujemo na ovom projektu i zahvaljujem se za podršku," izjavio je muftija Grabus.

Projekat 'Čitalačka značka' trajat će pet mjeseci, a uključivat će čitanje odabranih djela, debate, takmičenja, kvizove, posjete historijski važnim lokacijama u BiH i drugo.



Muftija Grabus i načelnik Hadžibajrić

## Sanacija Buzadži hadži Jahjine džamije

Za sanaciju Buzadži hadži Jahjine džamije, poznatije kao džamija "Nova mahala" iz budžeta Općine Stari Grad Sarajevo bit će izdvojeno 40.000 KM. Ovim sredstvima finansirat će se obnova krovne konstrukcije i munare na objektu sagrađenom krajem 15. vijeka čime će se spasiti od uništenja i sačuvati kao značajan vjerski objekat

i spomenik. Kako je pojasnio načelnik Hadžibajrić, prijedlog za sanaciju džamije uputili su mu iz Džematskog odbora nakon čega je održan sastanak i odmah postignut dogovor o izdvajanju sredstava za ovaj značajni objekat. Riječ je o obnovi munare i krova, koji su u veoma trošnom i dotrajalom stanju. To je prioritet za nastavak dalje rekonstrukcije džamije. Ukupna vrijednost radova je 90.000 KM, a Općina će finansirati kompletnu obnovu krova i munare sa 40.000 KM.



Džamija se nalazi u ulici Grličića brdo



## O značaju ove podrške govorio je mutevelija džamije Abduldžebar Karahmet.

„Džamija je izgrađena krajem 15. vijeka i pod zaštitom je države. Imajući u vidu da je izgrađena u osmanskom stilu našem džematu, ali i cijelom Starom Gradu, veoma je bitno da je sačuvamo i uradimo rekonstrukciju jer je zaista u veoma trošnom stanju,“ izjavio je mutevelija Karahmet.

## Podrška projektima Medžlisa Islamske zajednice u Sarajevu

Za projekte Medžlisa Islamske zajednice u Sarajevu ove godine će iz budžeta biti izdvojeno ukupno 53.000 KM. U ovaj iznos uračunato je i 40.000 KM za projekat obnove krovne konstrukcije i munare Buzadži hadži Jahjine džamije, ali i sredstva za obnovu mekteba džamije SAGR hadži Alije na Hridu (3.000 KM), za nabavku novih ćilima u Mišćinoj džamiji (5.000 KM), te za rekonstrukciju krova Čokadži Hadži Sulejmanove džamije (Jedileri) (5.000 KM).

Predsjednik Medžlisa Islamske zajednice u Sarajevu Jusuf Zahiragić kazao je da je evidentna podrška koju Općina i načelnik Hadžibajrić pružaju svim vjerskim zajednicama. „Mi imamo puno projekata koje realizujemo na području Starog Grada i to su veoma značajni objekti koji su pod zaštitom države. Radimo projekte za njihovo održavanje i rekonstrukciju, tražimo donatore, a svaka donacija je dobrodošla. Načelnik Ibrahim Hadžibajrić je prepoznao naše aktivnosti, stalno nas podržava i Medžlis Islamske zajednice Sarajevo se zahvaljuje na uspješnoj saradnji koju imamo niz godina“, istakao je predsjednik Zahiragić.

U 2021. godini iz budžeta Općine Stari Grad izdvojeno je više od 100.000 KM za podršku vjerskim zajednicama i ustanovama, a najvećim dijelom je finansirana njihova obnova i gradnja.




Zahiragić i Hadžibajrić potpisali ugovor

### Podrška i u prethodnim godinama

Općina Stari Grad Sarajevo je i prethodnih godina izdvajala znatna sredstva za sanacije džamija. Finansirana je sanacija Ferhadija džamije, Bistričke džamije, Lubine džamije, Balibegove džamije, te džamija na Hridu, Žagrićima, Mahmutovcu, Faletićima i brojnih drugih.



Unutrašnjost džamije Ferhadija



Izdvađa se 3.000 KM za nabavku novih ćilima u Mišćinoj džamiji

## Podrška ustanovama



# Integracija osoba sa poteškoćama u društvo kroz podršku projektima

**Podrškom ovim institucijama doprinosimo da djeca, osobe sa poteškoćama u razvoju kao i njihove porodice poboljšaju kvalitet života i pružimo im okruženje u kojem će svi imati jednake mogućnosti**

**K**ako bi se stvorili što bolji uslovi integracije osoba i djece sa teškoćama u razvoju u zajednicu, a time postigla i bolja kvaliteta njihovih života, važno je pružiti im podršku u svim sferama života, pa tako i u društvenom djelovanju. Upravo s tim ciljem, Općina Stari Grad Sarajevo predvođena općinskom načelnicom mr Ibrhimom Hadžibajrićem kontinuirano podržava aktivnosti i značajne projekte najranjivijih kategorija našeg društva.

„Podrškom ovim institucijama doprinosimo da djeca, osobe sa poteškoćama u razvoju kao i njihove porodice poboljšaju kvalitet života i pružimo im okruženje u kojem će svi imati jednake mogućnosti. Mnogo puta sam bio u prilici i uvjerio se koliko im je potrebna podrška i koliko im to znači“, izjavio je načelnik Hadžibajrić.

## Podrška Servis centru 'Dajte nam šansu'

Krajem februara potpisan je Ugovor o dodjeli finansijskih sredstava u iznosu od 10.000 KM koja će biti iskorištena za sufinansiranje rada Servis centra „Dajte

nam šansu“.

Ovaj Centar djeluje od 2017. godine u prostorijama koje im je dodijelila i adaptirala Općina Stari Grad, te okuplja roditelje i djecu sa teškoćama u razvoju. Prilikom posljednje posjete ovom Centru, u decembru prošle godine, načelnik Hadžibajrić najavio je i sistemsku podršku njihovom radu, kroz planiranje sredstava u budžetu.

„Najavio sam da ćemo naći način za sistemsku podršku Servis centru 'Dajte

nam šansu' i to smo ozvaničili potpisivanjem ugovora na osnovu kojeg ćemo ove godine izdvojiti 10.000 KM za njihov rad. Na taj način pomoći ćemo realizaciju značajnih projekata za naše građane“, poručio je načelnik Hadžibajrić.

Servis centri "Dajte nam šansu" okupljaju 810 porodica u KS, od čega je oko 130 porodica iz Starog Grada, što dovoljno pokazuje potrebu za njihovim postojanjem i djelovanjem.

“Ovo je vrlo značajan dan ne samo za



*Hadžibajrić u posjeti Centru "Dajte nam šansu"*



Centar ‘Dajte nam šansu’ nego i za porodice koje imaju člana sa teškoćama u razvoju. Ova podrška pokazuje da je lokalna zajednica i načelnik Hadžibajrić prepoznao važnost postojanja naše institucije na području općine Stari Grad, a koja pruža socijalne usluge porodicama koje imaju člana s teškoćama u razvoju”, kazala je direktorica Centra Ines Kavalec.

## Zavod Pazarić

Izdvojena su i finansijska sredstava za nabavku novog namještaja za opremanje prostorija Zavoda Pazarić. Sredstva će biti utrošena za zamjenu dotrajalog namještaja u dnevnom boravku namijenjenom za najmlađe korisnike Zavoda. Na taj način osigurat će im se mnogo bolji uslovi za boravak i rad.

Zavod za zbrinjavanje mentalno invalidne djece i omladine Pazarić ima 335 korisnika od čega je 121 korisnik sa područja Kantona Sarajevo, a 27 korisnika sa područja općine Stari Grad. „Sredstva koja su nam donirana od Općine Stari Grad i načelnika Hadžibajrića upotrijebit ćemo za zbrinjavanje, odnosno opremanje dnevnih boravaka za naše najmlađe kategorije. Planiramo opremiti dva paviljona, a najmlađi korisnik jednog od njih ima svega 18 mjeseci,“ izjavio je direktor Zavoda Samir Suljagić. „U Zavodu borave korisnici od uzrasta 18 mjeseci do 30 godina. Radi se o djeci koja imaju pridruženu patologiju, nisu samo u pitanju intelektualne poteškoće, nego i neki somatski problemi, a jedan broj njih je i potpuno nepokretan, neki su polupokretni, a jedan mali broj njih smo uspjeli osposobiti i uključiti u sistem obrazovanja kroz proces rehabilitacije,“ dodao je Suljagić. U znak zahvalnosti za podršku koju im je pružio, korisnici Zavoda izradili su za općinskog načelnika rad na alu foliji koji prikazuju Latinsku ćupriju i Muzej Sarajevo 1878-1918.

## Sportsko društvo slijepih i slabovidnih KS

Sportsko društvo slijepih i slabovidnih osoba Kantona Sarajevo već 13 godina realizuje projekat „Problem bijelog štapa-inkluzija kroz sport“. Cilj projekta je uključiti mlade u aktivnosti koje mogu provoditi slijepe osobe i na taj način kod



*Zamjena dotrajalog namještaja u Zavodu Pazarić*

njih probuditi senzibilitet prema ovoj kategoriji. Slijepe osobe tako pokazuju učenicima kako igrati pikado za slijepe, fudbal za slijepe ili učestvovati u šetnji sa njima ukazujući na problem bijelog štapa, organizuju edukativnu nastavu kako za učenike tako i za roditelje učenika, a od ove godine u svoje aktivnosti uvrstili su i kuglanje kao još jednu disciplinu kojom se slijepe bave.

Ugovor o namjenskom grantu u iznosu od 5.000 KM za ovu godinu, prošlog mjeseca potpisali su općinski načelnik mr. Ibrahim Hadžibajrić i sekretar Sportskog društva slijepih i slabovidnih KS Zoran Đukić. Inače, iz budžeta Općine Stari Grad u posljednjih 13 godina izdvojeno je oko 65.000 KM za finansiranje aktivnosti Sportskog društva slijepih i slabovidnih osoba KS.

## Obilježen Svjetski dan osoba s Down sindromom

Povodom Svjetskog dana osoba s Down sindromom, koji se širom svijeta obilježava 21. marta s ciljem podizanja svijesti o potrebama i mogućnostima uključivanja osoba sa Down sindromom u društvo, općinski načelnik mr. Ibrahim Hadžibajrić ugostio je štićenike Zavoda Mjedenica i korisnike Servis centra “Dajte nam šansu”.

“Važno je da ukazujemo na značaj ovog datuma kako bi se podigla svijest društva o značaju inkluzije osoba sa Down sindromom. Svojim primjerom trebamo pomoći u rušenju predrasuda i omogućiti njihovo ravnopravno uključivanje u društvo,“ poručio je načelnik Hadžibajrić

na prijemu u Općini Stari Grad. Njegovi gosti bili su sretni zbog pažnje koja im je ukazana, a kako su istakle direktorica Zavoda Mjedenica Mirsada Čakal i koordinatorica Servis centra “Dajte nam šansu” Eldina Kujović, ovakvi susreti i prijemi su značajni za njih jer im pokazuju da nisu zaboravljeni. Downov sindrom je genetski poremećaj koji je uzrokovan prisustvom jednog hromosoma viška, a nastaje u trenutku začeća. Zbog toga je Down Syndrom International (DSI) službeno odredio 21.03 kao Svjetski dan osoba s down sindromom. Ovaj datum je specifičan i značajan jer 21. mart (21.03) predstavlja trisomije, tri hromosoma u 21. paru koji uzrokuju Downov sindrom.



*Općina 13 godina podržava Sportsko društvo slijepih i slabovidnih Kantona Sarajevo*



*Hadžibajrić: Rušiti predrasude o osobama sa Down sindromom*

## Podrška i posjete

# Stari Grad će uvijek biti uz herojski grad Goražde

Općina Stari Grad Sarajevo prepoznatljiva je u Bosni i Hercegovini, ali i šire, po odličnoj saradnji sa drugim lokalnim zajednicama. Mi smo lideri u takvom povezivanju, ali i pružanju konkretne podrške. Goražde je herojski grad istočne Bosne i uvijek mogu računati na našu podršku – poručio je općinski načelnik mr Ibrahim Hadžibajrić tokom susreta sa gradonačelnikom Goražda Ernestom Imamovićem. Sastanak je organizovan s ciljem potpisivanja ugovora o sufinansiranju rekonstrukcije lokalnog puta Suhodol-Poratak-Zaimov Do u Goraždu, za koji će Općina Stari Grad izdvojiti 10.000 KM.

Susret bio je prilika da načelnik Hadžibajrić i gradonačelnik Imamović razgovaraju o stanju u lokalnim zajednicama kojim rukovode, s posebnim aspektom na podršku razvoju privrede. Načelnik Hadžibajrić je upoznao gradonačelnika Imamovića sa olakšicama i podrškom koju je Općina Stari Grad omogućila privred-



*Gradonačelnik Imamović izrazio zahvalnost načelniku Hadžibajriću*

nicima tokom pandemije korona virusa, a potom ga poveo i u obilazak uže starogradske jezgre.

Kako je istakao gradonačelnik Imamović, ovo iskustvo će mu dobro doći, te se zahvalio na tome. „Ovo je primjer kako se radi iskustvom i dinamikom procesa koje je načelnik Hadžibajrić i ranije u susretima sa mnom pokazao. Ovo je inspi-

racija za moj dalji rad, da se od jedne lokalne zajednice može napraviti reprezentno mjesto za sve građane koji tu žive. Takvim primjerom ide i Goražde gdje sve naše lokalne samouprave i BPK Goražde žele raditi i zajedno sarađivati,“ poručio je Imamović. Iskoristio je priliku da se zahvali i za izdvojena sredstva za sanaciju puta Suhodol-Poratak-Zaimov do.

# 10.000 KM za izgradnju Muzeja 505. viteške brigade u Bužimu

Općinski načelnik mr Ibrahim Hadžibajrić i načelnik Općine Bužim Mersudin Nanić potpisali su 24. februara Ugovor o izdvajanju sredstava za sufinansiranje izgradnje Muzeja 505. viteške brigade Petog korpusa Armije Bosne i Hercegovine u Bužimu, prema kojem će iz budžeta Općine Stari Grad biti izdvojeno 10.000 KM za sufinansiranje ovog projekta.

Muzej će podsjećati na sve ratne zasluge ove brigade, njenog čuvenog komandanta, generala Izeta Nanića, kao i sve poginule borce i pripadnike Petog korpusa Armije Bosne i Hercegovine, koji su položili svoje živote braneći našu domovinu. Kamen temeljac za muzej položen je u augustu prošle godine.

„Prilikom moje posjete Bužimu prije četiri godine, obećao sam svom tadašnjem domaćinu, sadašnjem načelniku Općine Bužim Mersudinu Naniću, da će Općina Stari Grad podržati izgradnju Muzeja 505. viteške brigade kada krenu konkretne projektne aktivnosti. Uvijek ćemo biti uz ovakve projekte jer ne dozvoljavamo da naša prošlost



*Sa potpisivanja ugovora za Muzej 505. viteške brigade*

bude zaboravljena“, poručio je načelnik Hadžibajrić.

Načelnik Općine Bužim Mersudin Nanić se zahvalio na podršci i prepoznavanju ove inicijative, te je pojasnio pojedinosti projekta. „Ovaj muzejski kompleks bit će smješten iznad turbeta našeg generala Izeta Nanića. Ukupna vrijednost investicije je dva miliona konvertibilnih maraka. Veći dio sredstava

smo obezbijedili zahvaljujući našim sredstvima, te vladama Unsko-sanskog kantona i Federacije BiH“, rekao je načelnik Nanić.

Potpisivanju ugovora prisustvovao je i vijećnik u Općinskom vijeću Stari Grad i u Gradskom vijeću Grada Sarajeva Vedad Deljković, koji je svesrdno podržao ovu inicijativu i doprinio da bude prihvaćena i u Gradskom vijeću.





## Podrška uspješnim sportistima i kolektivima

Uspješni mladi sportisti zaslužuju podršku Općine Stari Grad Sarajevo i uvijek rado podržavamo njihove napore kako bi im se, barem dijelom, olakšao težak sportski put, dugogodišnja je poruka općinskog načelnika mr. Ibrahima Hadžibajrića.

### Karatista Hamza Turulja dobio podršku

Uspješni karatista iz Starog Grada Hamza Turulji imat će podršku svoje lokalne zajednice i u sportskoj sezoni 2022/2023. Osim toga, kako je najavio načelnik Hadžibajrić, Hamza će biti i stipendista Općine Stari Grad kao uspješan student II godine Fakulteta sporta i tjelesnog odgoja. Prilikom potpisivanja ugovora o finansijskoj podršci, Hamza se zahvalio i ispričao svoje buduće planove. „Iza mene je zaista odlična godina. Zahvaljujući podršci načelnika Hadžibajrića i moje Općine Stari Grad uspio sam održati kontinuitet vrhunskih sportskih rezultata u prošloj godini. Odbranio sam titule seniorskog i U21 prvaka BiH. Osvojio sam zlatnu i bronzanu medalju na Balkanskom prvenstvu do 21. godine, kao i jedinu medalju za BiH na seniorskom Balkanskom prvenstvu. Učestvovao sam na prvom historijskom

#### Veliki potencijal

Hamza Turulja je osvajač srebrne medalje na Svjetskom prvenstvu za kadete, juniore i mlađe seniore 2019. godine u Čileu. Zbog tog, ali i drugih uspjeha koje je postigao posljednjih nekoliko godina, za Hamzu se može reći da je veliki potencijal za najsajjnija olimpijska odličja. Turulja je 2020. godine proglašen je za najboljeg mladog sportistu Bosne i Hercegovine.

Olimpijskom kvalifikacionom turniru za Tokyo 2020“, kazao je Hamza. Kao prioritet za 2022. godinu, izdvaja nastupe na međunarodnim takmičenjima. „Odlazak na ta takmičenja zahtijeva velika finansijska sredstva, koja moja porodica i ja ne možemo sami obezbijediti. Mnogo nam znači kada možemo računati na Općinu Stari Grad i zbog toga se još jednom zahvaljujem“, poručio je Hamza.

### Karate klub „Baščaršija“

Za podršku radu jednom od najuspješnijih i najmasovnijih karate klubova u BiH i koji je do sada osvojio više od 1000 medalja, iz budžeta Općine izdvojeno je 5.000 KM.

Karate klub „Baščaršija“ Sarajevo koji djeluje na području općine Stari Grad, osnovan je prije pet godina, a kako je istakao predsjednik Kluba Miralem Mandžuka koji je višestruki osvajač evropskih i svjetskih medalja, klub ne bi nizio ovakve uspjehe bez pomoći Općine Stari Grad Sarajevo i načelnika Hadžibajrića. „Svi naši uspjesi i rezultati ne bi bili mogući bez podrške Općine Stari Grad Sarajevo na čelu sa načelnikom mr. Ibrahimom Hadžibajrićem, kojem dugujemo posebnu zahvalnost. Veoma smo zahvalni na podršci i razumijevanju, a mi ćemo se truditi da istrajemo u ostvarivanju dobrih rezultata i da budemo još bolji i uspješniji“, poručio je Mandžuka.



Načelnik Hadžibajrić podržava karatistu Turulju

## Predstavljamo

# Tradicija duga pola vijeka: Uspješna priča starogradskog frizera Samira Toskića

**Frizersko-kozmetički salon Beta u srcu Starog Grada • Biti frizer nije samo posao, to je umjetnost • Sve je počelo od brijačnice dede Rifeta, kod Vijećnice**

U srcu Starog Grada, u ulici Prote Bakovića 2, frizersko-kozmetički salon Beta, vlasnika Samira Toskića više od pola vijeka stoji na usluzi građanima Starog Grada, ali i cijelog Sarajeva. Samir o svom zanatu priča sa velikom ljubavlju, ali i nostalgijom.

„Dedo Rifat bio je poznati sarajevski brico i imao je radnju kod Vijećnice. U njegovoj brijačnici svi su bili dobrodošli i nisu dolazili samo zbog usluge, nego i zbog druženja, priča, atmosfere. I nikada niko nije izašao nezadovoljan“, tvrdi Samir.

„Dedo Rifat je svoju ljubav i umijeće prenio na sina Aliju koji je nastavio istim putem. Alija, vrhunski frizer, nije prestajao da radi čak ni za vrijeme rata, kada je Sarajevo bilo pod opsadom, bez struje i vode. I tada je šišao svoje vjerne mušterije i nikada nikome nije naplatio. U znak zahvalnosti davali su mu namirnice,“ nastavlja Samir svoju priču. Kaže da je salon radio u kontinuitetu i u lijepim i u onim manje lijepim vremenima. Alija je zanatu naučio i svoje sinove, koji su sada uspješni frizeri. Samir je nastavio da radi u Starom Gradu, gdje su radili i njegov dedo i otac.

„Frizerski zanat počeo sam da učim od svog oca Alije i to kad mi je bilo samo 14 godina. Otac me naučio svemu, od šišanja, do tada popularnih natapiranih frizura,“ tvrdi. Postepeno je ulazio u posao, učio i trudio se da bude što bolji, a ljubav prema ovom zanatu je došla sama, prirodno, gledajući zadovoljne i nasmijane klijente kako izlaze iz salona.

### U salonu sniman film „Naša svakodnevica“

Salon koji se danas zove „Beta“ je dugo vremena nosio ime „Alija“, po tadašnjem vlasniku Aliji Toskiću, ali sve mušterije su ga zvale „Aljo“. U salon su tada dolazila mnoga poznata lica, pisci, redatelji, glumci, pjevači. Jedan od njih je bio i reditelj rahmetli Sejfudin Tanović - Babo koji je zapisivao sve što se oko njega dešavalo, odnosno svakodnevni život. A njegova kćerka, poznata bh redateljica Ines Tanović je kasnije te priče ekranizovala u filmu 'Naša svakodnevica', u kojem se kako kaže Samir većina radnje odvija upravo u njihovom frizerskom salonu.



Samir Toskić: Zanat sam naučio od oca Alije

Za frizersko umijeće osvojio je mnoge nagrade: u Beogradu, Zagrebu, Sloveniji, a prva, možda i najznačajnija za njega je sa takmičenja u Novom Sadu kada je osvojio prvo mjesto.

„Prva nagrada koju sam osvojio bila je na Međunarodnom takmičenju u Novom Sadu. Mjesecima sam vježbao, radio na jednom modelu, a na takmičenju su se radile tri vrste frizura. Tražila se čistoća i svaki talas je imao svoju priču. Ja sam imao svog oca da od njega učim, iako je nekad bilo naporno, na kraju se taj trud i upornost isplatila“, rekao nam je Toskić.

### Pratiti trendove, učiti i nadograđivati se

Biti frizer nije samo posao, to je i umjetnost, tvrdi Samir. U ovom poslu posebno je važno pratiti trendove, stalno učiti i nadograđivati se. Da bi išao u korak sa novim stilovima frizura pohađao je časove u prestižnoj londonskoj akademiji Pierr Alexandre gdje je imao priliku da uči od najpoznatijih svjetskih frizera.

„Na akademiju Pierr Alexandre u Londonu sam išao na dodatnu edukaciju. Za četiri sedmice sam dobio zvanje profesionalca, što je bila rijetkost. U Londonu sam ostao godinu dana na dokfifikaciji. Ja sam šišao modele, i to se snimalo i kasnije slalo akademijama širom svijeta. Radio sam sa Pierr Alexandrom i mnogim drugim prestižnim imenima ovog posla“, ispričao je Toskić.

### Jedina pomoć od načelnika Hadžibajrića i sekretarke Destanović

Za vrijeme korone im nije bilo lako, nije se moglo raditi i pomoć lokalne zajednice je bila od presudnog značaja. „Korona je dosta uticala na posao, nije se radilo mjesec i po. Izgubio se kontinuitet, ljude je bilo strah kontakta, zatvorenih prostora. Srećom, mi imamo stalne klijente, pa iako je korona učinila svoje, sada pokušavamo da se vratimo na ono kako je bilo prije korone. Iako je sve poskupjelo, mi svoje cijene ne mijenjamo. Cjenovnik nam je isti od 2008. godine“, kazao je Toskić.



Salon se nalazi u ulici Prote Bakovića

„Načelnik Hadžibajrić i sekretarka Alma Destanović su puno pomogli nama zanatljama i to je jedina pomoć koju smo imali. Jedino su oni nešto uradili za vrijeme korone, a i poslije. Bore se da ono što vrijedi opstane u Starom Gradu. A načelnik i sekretarka su pokretač svega i ja to jako cijenim“, dodao je Toskić.





## Podrška vjerskim institucijama

Od početka 2022. godine izdvojena su značajna sredstva za podršku vjerskim institucijama, među njima i Vrhbosanskom bogoslovnom sjemeništu, te Staroj pravoslavnoj crkvi. U januaru ove godine općinski načelnik mr. Ibrahim Hadžibajrić i protojerej Stare pravoslavne crkve Velimir Divljanović potpisali su ugovor o namjenskom grantu u iznosu od 15.000 KM za nastavak radova na uređenju dvorišta Stare pravoslavne crkve u Starom Gradu. Starješina Stare pravoslavne crkve protojerej Divljanović kazao je da je bio ugodno iznenađen pozivom iz Općine Stari Grad i odgovorom općinskog načelnika Ibrahima Hadžibajrića.

„Zaista se me obradovali kada ste prihvatili naš zahtjev i hvala vam na tome. Mi smo zahvaljujući donacijama uspjeli uraditi tri strane dvorišta, a ostala je još jedna, prednja strana na ulazu u crkvu gdje se nalazi kaldrma koja će se presložiti. To ćemo nastaviti na proljeće zahvaljujući vašem učešću,” izjavio je protojerej Divljanović. Iskoristio je priliku da pozove općinskog načelnika Hadžibajrića u posjetu njihovim prostorijama.

## Druga godina podrške Vrhbosanskom bogoslovnom sjemeništu

Prošle godine je iz budžeta Općine Stari Grad izdvojeno 42.000 KM za sanaciju zapadnog dijela fasade na zgradi Vrhbosanskog bogoslovnog sjemeništa. Podrška se nastavlja I ove godine nakon što su

općinski načelnik mr Ibrahim Hadžibajrić i rektor Vrhbosanskog bogoslovnog sjemeništa dr Zdenko Spajić potpisali ugovor o sufinansiranju obnovu južne i jednog dijela istočne fasade na ovom nacionalnom spomeniku kulture. Za te namjene bit će izdvojeno 35.000 KM. Rektor Vrhbosansko bogoslovnog sjemeništa dr Zdenko Spajić zahvalio se načelniku Hadžibajriću na izdvojenim sredstvima i istakao kako ova pomoć mnogo znači, te da se na ovaj način kulturni i vjerski objekti koji su od nacionalnog značaja štite od daljeg propadanja.

„Ovom prilikom želim da se zahvalim načelniku Ibrahimu Hadžibajriću za podršku i prošle godine u prvoj fazi i ove godine u drugoj fazi radova. Radovi su počeli, skele se postavljaju, plan je da za nekih sedam mjeseci radovi budu završeni. Sada se radi frontalni, prednji dio fasade, što je i najzahtjevniji dio, a ukupno će radovi koštati 500.000 konvertibilnih maraka”, istakao je rektor Spajić.



15.000 KM za uređenje dvorišta Stare pravoslavne crkve

## Načelnik Hadžibajrić nagradio najvrijednije uposlenike Općine Stari Grad



Hadžibajrić sa vrijednim uposlenicima Općine

Za izuzetne rezultate rada na uređenju i čišćenju putnih pojaseva, javnih površina, uklanjanju rastinja, otpada, čišćenju snijega i leda sa ulica i druge fizički zahtjevne poslove, općinski načelnik mr. Ibrahim Hadžibajrić uručio je novčane nagrade uposlenicima Odjeljenja za održavanje putnih pojaseva koje djeluje pri općinskoj Službi za investicije i komunalne poslove. Svi uposlenici Odjeljenja koji su radili teške fizičke poslove i za svoj rad u 2021. godini ocijenjeni ocjenom „naročito uspješan”, u skladu sa zakonom, dobili su nagrade u visini jedne mjesečne plate.

Pored njih, za rezultate rada nagrađena su i tri uposlenika Sektora za tehničke poslove koji su također radili na fizički zahtjevnim poslovima, koji su uključivali i rad na terenu, te kontinuirani angažman na kontroli stanja i zaštite od poplava u novembru prošle godine.

„Zasluzili ste svoje nagrade jer ste vrijedno i čestito radili svoj posao i ispunili sve postavljene ciljeve, pa i više od toga. Pokazali ste da možemo računati na vas i u najtežim uslovima i djelovali ste na terenu bez obzira na vremenske uslove, kišu, snijeg, poplave... Svojim radom ste direktno doprinijeli boljim uslovima za svakodnevni život naših građana i to treba biti nagrađeno. U Općini Stari Grad ćemo rad i trud uvijek nagrađivati, a nerad nećemo tolerisati,” poručio je načelnik Hadžibajrić prilikom uručjenja nagrada uposlenicima.

## Pobratimske općine

# Općina Mehmetçik – Najbolje grožđe i najljepše plaže Turske Republike Sjeverni Kipar

**Stari Grad i Mehmetçik pobratimi od 2016. godine ● Burna i bogata historija ● Brojni ekskluzivni hoteli uz obale Sredozemnog mora**

Općina Mehmetçik nalazi se u sredini tzv. kiparskog roga, u regiji po imenu Işkele, na samom istoku Turske Republike Sjeverni Kipar. Sa više od 320 sunčanih dana godišnje, u Mehmetçiku se uzgaja najkvalitetnije grožđe, maslinovo ulje i med, a na njegovim plažama uživaju turisti iz svih krajeva svijeta. Stari Grad Sarajevo i Mehmetçik povezoao je zajednički veliki prijatelj, a to je Općina Osmangazi Bursa. Naime, u aprilu 2016. godine, za vrijeme svečanog obilježavanja dana Općine Osmangazi, upoznali su se općinski načelnik mr. Ibrahim Hadžibajrić i načelnik Općine Mehmetçik Cemil Sariçizmeli. Načelnik Hadžibajrić iskoristio je priliku da pozove Sariçizmeli i njegovu delegaciju da posjete Sarajevo. Poziv je prihvaćen, a posjeta je početkom maja 2016. godine. Oduševljen Starim Gradom, njegovim građanima i funkcionisanjem općinske administracije, načelnik Sariçizmeli izrazio je želju da se dvije lokalne samouprave trajno povežu Sporazumom o bratimljenju i saradnji.

Grožđe je simbol i najpoznatiji brend Mehmetçika na Sjevernom Kipru, ali i šire. U Mehmetçiku se posljednjih 60 godina početkom avgusta održava čuveni i tradicionalni Festival grožđa na kojem se okupe brojne zvanice i gosti iz cijelog svijeta. Uz tadašnjeg predsjednika Turske Republike Sjeverni Kipar Mustafu Akincija, počasni gost na 56. Festivalu grožđa u avgustu 2016. godine, bio je i općinski načelnik mr. Ibrahim Hadžibajrić. Za vrijeme obilježavanja festivala upriličeno je i svečano potpisivanje Sporazuma o bratimljenju i saradnji između općina Stari Grad Sarajevo i Mehmetçik, a potpisali su ga načelnici Hadžibajrić i Sariçizmeli.

## Poljoprivreda, turizam, historijsko naslijeđe

Većina od ukupno 1.300 stanovnika Mehmetçika živi od poljoprivrede.



*Ponos Mehmetçika, hotelski kompleks Kaya Artemis*



*Načelnik Sariçizmeli na mezarju Kovači*

Skoro pa savršena mediteranska klima dozvoljava uzgoj vrhunskog grožđa od kojeg se prave brojni proizvodi. Također, stanovništvo uspješno uzgaja i plasira proizvode poput maslinovog ulja, ljekovitog bilja i meda. Za razliku od susjedne Republike Kipar, Turska Republika Sjeverni Kipar tek u posljednjih deset godina značajno ulaže u razvoj turizma i izgradnju velikih i luksuznih hotelskih kompleksa. Općina Mehmetçik se posebno ponosi kompleksima Kaya Artemis i Noah's Ark Delux koji u toku cijele godine primaju turiste iz svih krajeva svijeta.


Historija Kipra izuzetno je zanimljiva, burna i teška, te i danas utiče na život svih njegovih stanovnika. Otok je naseljen hil-



*Hadžibajrić i Sariçizmeli potpisali sporazum u avgustu 2016. godine*

jadama godina, a njime su vladale sve tadašnje najmoćnije sile svijeta: antički Asirci, Perzijanci, Grci, Rimljani, Egipćani i Mlećani. U 15. stoljeću otok zauzimaju Osmanlije, koje su se tu zadržale tri stoljeća. Nakon raspada Osmanskog carstva, vlast na otoku preuzima Velika Britanija, a polovinom prošlog stoljeća Kipar dobija nezavisnost. Od 1974. godine otok je podijeljen na međunarodno priznatu Republiku Kipar (naseljena kiparskim Grcima) i Tursku Republiku Sjeverni Kipar (naseljenu kiparskim Turcima), koju jedino priznaje Republika Turska. Taj komplikovani pravni status ne dozvoljava istinski politički, kulturni i privredni razvoj Sjevernog Kipra.





Naziv institucije	Telefon
Policija	122
MUP Stari Grad	033/ 532-000
Hitna pomoć	124
Vatrogasci	123
Taxi Sarajevo	1515
Turistički informativni centar	033/ 532-606 i 580-999
Info centar Općine	033/ 233-184
Mjesne zajednice	033/ 265-526
Porezna uprava	033/ 555-481
Apoteka „Baščaršija“	033/ 272-300
Biro Stari Grad	033/ 557-247
Općina Stari Grad Sarajevo	033/ 282-300

Općinska služba	Telefon
Služba kabineta općinskog načelnika	033/282-400
Općinsko vijeće	033/282-313
Služba za odnose s javnošću i informacione sisteme	033/282-491
Služba civilne zaštite	033/282-395
Služba za investicije i komunalne poslove	033/282-417
Služba za urbanizam	033/282-316
Služba za imovinsko-pravne, geodetske poslove i katastar i stambene poslove	033/282-335
Služba za boračko-invalidsku i socijalnu zaštitu	033/282-397
Sektor za tehničke poslove i obezbjeđenje	033/282-452
Služba za opću upravu i inspeksijske poslove	033/282-357
Služba za finansije	033/282-427
Služba za privredu	033/282-359
Općinsko pravobranilaštvo	033/282-371
Služba za obrazovanje, kulturu i sport	033/282-365
Služba za lokalni razvoj i poslove mjesnih zajednica	033/265-525

-  Informacije
-  Policija
-  Parking
-  Prva pomoć
-  Toalet
-  Pošta
-  Banka



Ramazan şerif  
mubarek olsun